



Kvinnherad kommune

Fellestenester
Politisk sekretariat

Rosendalsvegen 10

5470 ROSENDAL

Tel: 53483100

Fax: 53483130

Org. nr: 964 967 636

Bankgiro: 3460.07.00083

post@kvinnherad.kommune.no

www.kvinnherad.kommune.no

Miljøverndepartementet

Postboks 8013 Dep

0030 OSLO

Saksbehandlar
Trond Sætereng

Tlf. direkte innval

Vår ref.
2009/2782

Dykkar ref.

Dato
31.08.2009

Høring på forslag til statlege planretningsliner for differensiert forvaltning av strandsona langs sjøen - Uttale

Kvinnherad formannskap hadde saka føre i møte 27.08.09, sak 2009/59.

Vi legg ved utskrift av møteboka og syner til vedtaket.

Med helsing

Mette Guddal
møtesekretær

Kopi: Samarbeidsrådet for Sunnhordland

Saksframlegg

Kvinnherad kommune

Saksmappe Saksbehandlar

2009/2782 Trond Sætereng

Saksgang

<i>Saksnr</i>	<i>Utval</i>	<i>Møtedato</i>
2009/59	Formannskapet	27.08.2009

Høyring på forslag til statlege planretningslinjer for differensiert forvaltning av strandsona langs sjøen - uttale

Innstilling:

Kvinnherad kommune krev at alle kommunane i Sunnhordland vert strokne frå pkt 4.3 i framtidige statlege planretningslinjer for differensiert forvaltning av strandsona langs sjøen.

Behandling i Formannskapet den 27.08.2009

FRAMSETTE FORSLAG FRÅ:

Ole Torbjørn Holmedal (Frp):

Kommunar / regionar må gjevast større fridom til differensiert strandsoneforvaltning.

Torfinn Myklebust (IP) / Erling Boland (Ap) / Gunnar Våge (Sp) / Bjarne Berge (TS) / Gunn Mari Moberg (H) / Ole Torbjørn Holmedal (Frp) – tillegg:

.. og erstattast av Sunnhordlandskommunane sin strandsonesplan/-strategi.

RØYSTING

- Innstillinga samrøystes vedteken
- Myklebust m/fl. sitt forslag – samrøystes vedteke
- Holmedal sitt forslag – samrøystes vedteke

Vedtak frå Formannskapet den 27.08.2009

Kvinnherad kommune krev at alle kommunane i Sunnhordland vert strokne frå pkt 4.3 i framtidige statlege planretningslinjer for differensiert forvaltning av strandsona langs sjøen og erstattast av Sunnhordlandskommunane sin strandsonesplan/-strategi.

Kommunar / regionar må gjevast større fridom til differensiert strandsoneforvaltning.

Saksutgreiing:

Faktagrunnlag

Miljøverndepartementet sendte i skriv 29.06.2009 ut forslag til statlege planretningslinjer for differensiert forvaltning av strandsona langs sjøen til høyring i m.a. kommunane. Fristen for å gje uttale til forslaget er sett til 4. september 2009.

Bakgrunn for at det vert foreslått statlege planretningslinjer for strandsona er at det i ny plan- og bygningslov (plandelen) av 27. Juni 2008 nr. 71 også er fastsett nye regler om strandsona. Ved behandling av lova blei det og føresett at det skulle utarbeidast statlege planretningslinjer for ein differensiert strandsonopolitikk.

Retningslinene skal etter § 6-2 i ny lov fastsettast av Kongen.

Det ein ønskjer å oppnå med retningslinene er å hindra uheldig bygging i 100-metersbeltet langs sjøen, samstundes som det gjennom planlegginga skal leggjast til rette for ei berekraftig lokal utvikling bygd på dei ulike natur- og kulturgjevne forholda langs kysten. Det vert difor noko ulike retningslinjer for sentrale områder der presset på areal er stort, og for områder med mindre press på areal.

I retningslinene pkt 4.2 vert det foreslått at gjeldande "Rikspolitiske retningslinjer for planlegging i kyst- og sjøområder i Oslofjordregionen av 9. Juli 1993" (vedlagt) fortsatt skal gjelda for kysten i Østfold, Oslo, Akershus, Buskerud, Vestfold og Telemark. I pkt 4.3 vert det foreslått at prinsippa i retningslinene for Oslofjordregionen også skal brukast tilsvarande for kysten i Aust-Agder og Vest-Agder og delar av kysten i Rogaland, Hordaland, Møre og Romsdal, Sør-Trøndelag og Nord-Trøndelag, men avgrensa til 100-metersbeltet på land. Vurderinga av kva for kommunar som er omfatta av dei ulike delane av retningslinene er basert på omgrepet sentralitet, dvs basert på ei vurdering av kor den einskilde kommune ligg plassert i forhold til større byar. Av sunnhordlandskommunane er det berre Etne som ikkje er plassert i det området som vert føreslege behandla på same måte som kommunane i Oslofjordregionen. Den konkrete vurderinga av områdeavgrensing er det miljøverndepartementet som står for, men som det også står i høyringsbrevet

"Det er i avgrensningen også lagt vekt på vurderingar gjort av fylkesmenn og fylkeskommuner, ut fra deres erfaringar ved behandlinga av saker om bygging i strandsonen."

Miljøverndepartementet ber spesielt om at det i høyringa vert gjeve synspunkt på den føreslegne geografiske avgrensinga og om bidrag til auka kunnskapsgrunnlag om strandsona som og evt kan påverka innhaldet i retningslinene.

Hausten 2008 utarbeidde Samarbeidsrådet for Sunnhordland "Strandsonestrategi for Sunnhordland." Denne vart vedteken i alle 8 kommunane i desember 2008.

Bakgrunn for denne saka var m.a. at det ved fleire høve hadde vore drøfta internt i Sunnhordlandsregionen kor vanskeleg det er å få til ønska utvikling i strandsona og at det var ønskeleg å koma over i ein praksis der strandsona, i tråd med lange tradisjonar, igjen skulle kunne nyttast til styrking av næringsgrunnlaget i Sunnhordland og sikra busetjing i lokalmiljøa.

Vedteken strandsonestrategi for Sunnhordland er i desse dagar konkretisert i eit prosjekt i samarbeid med fylkesmannen i Hordaland og Hordaland fylkeskommune, der den eine ambisjonen er å utarbeida ein interkommunal plan for strandsona i Sunnhordland og den andre er å styrka planarbeid som politisk verkty.

Drøfting

Som vist ovanfor er alle sunnhordlandskommunane, utanom Etne, plassert i den delen av retningslinene som skal behandlast på same måten som Oslofjordregionen. Bakgrunn for denne vurderinga er at desse kommunane er plassert nært større byar og difor er utsett for eit tilsvarande utbyggingspress som kommunane i Oslofjordregionen.

Denne vurderinga kjenner vi oss ikkje igjen i og meiner og å kunne dokumentera at utbyggingspresset i sunnhordlandsregionen ikkje kan samanliknast med Oslofjordregionen. Her syner vi m.a. til at Sunnhordland har ei kystline på 3.571 km og at det i perioden 1985-2004 berre vart utbygd 2,3% av denne kystlina. I tillegg meiner vi å kunne dokumentera gjennom oversiktsbilete av strandsona i Sunnhordland at nedbygging på langt nær er komen like langt her som i Oslofjorden.

Den demografiske utviklinga i Sunnhordland peiker heller ikkje i ei retning som tyder på at utbyggingspresset vil auka i åra som kjem. Snittalderen på befolkninga i regionen vil auka i åra som kjem og talet på innbyggjarar vil etter kvært gå nedover. For lokalpolitikarane i regionen utgjere denne utviklinga den aller største utfordringa i åra som kjem.

Lokalpolitisk er det overmåte viktig at alle ressursar vert tekne i bruk for å snu ei negativ utvikling, slik at heile landet vert teken i bruk. Dette meiner vi godt let seg gjera, utan at dette vil gå utover mangfaldet i naturen, landskaps-/kulturverdiar eller tilgongen for allmenta i strandsona. Nøkkelen ligg, slik vi ser det, i å gjennomføra gode planprosessar, slik at innbyggjarane i Sunnhordland får eit eigarforhold til vedtekne planar og tek ei ansvar for fellesskapet i eit berekraftig perspektiv.

For at statlege planretningsliner for differensiert forvaltning av strandsona skal kunne ha ein viss legitimitet i befolkninga er det vårt syn at bakgrunn og grunngjeving for den geografiske inndelinga i retningslinene vert forstått. Den føreslegne inndelinga bidreg ikkje til ei slik forståing og må difor endrast til at alle sunnhordlandskommunane vert trekt ut frå forslaget pkt 4.3.

Vedlegg:

1. Høyringsutkast 29.06.2009 frå Miljøverndepartementet; "Høring – forslag til statlige Planretningslinjer for differensiert forvaltning av strandsonen langs sjøen.
2. Samarbeidsrådet for Sunnhordland sak 42/06.11.2008;"Strandsonestrategi for Sunnhordland"